

PABORO ISANGUENAQUINERI EJESOSATI

Paboro ibetsataigacari Ejesosati.

1 ¹¿Aintajeguibi nopiguemisantacagane canta Ejesoquë? Nasanguenataiguimini naro Paboro. Igáquena Jesoquirisito nanguenguitsatocoquineri. Aisati icocaquena Tosorintsi nasanguenataiguimi obirojeguinta quemisantatsiri irasi Jesoquirisito aisati përosati piquemisantaiganaqueri Iriro. ²Nocoguini përosati ingábintsaguemi Pabati Tosorintsi aisati iromagoriasëretaguemi arota intimacagaiguemi caninasati. Ingantaiguëmiro Iriro aisati Atingomi Jesoquirisito.

Icoigacái Tosorintsi.

³Aroquenta aquemisanqueri Quirisito, tojai icábintsasantacái Tosorintsi yamai yaca quibatsica. Iriro Iriro Atingomi Jesoquirisito. Yamai yoganinatacái aisati anganquima aiquenta cara iráganacái canta Jonogaguitequë. Yamai icantobencái antagaisati caninaropague ora paniacha Jonogaguitequë eironta iraisati Quirisito. Iroro intsome angantocotiri: “Caninarisonorigunte Tosorintsi”. ⁴Jiraisonorigunte cara teraiquerai irobetsiquiro quibatsi, icoigacái Tosorintsi arota anguemisantiri Quirisito cara icamobicái arota iraganinasëretái aisati iraniacananatái catingasati Iriroquë. ⁵Inintasantacáinta Tosorintsi iroro ora icoigobicái jiraisonorori, itomintacái yasincái ira

Atingomi Otororintsite cara aquemisanqueri Quirisito Ira camobicái, cara isëretaca Tosorintsi jiraisonorori. ⁶Iroro ora intsome angantocotiri: “Tosorintsi caninarisonorigunte”. Icábintsasantacái tojaisonorori eironta irasi Quirisito Ira inintasanoti. ⁷Tojaisonorinta inintasantacái Tosorintsi igáqueri Itomi icamobicái. Iraatanë icamaque ijocobentajáiro ora acantaguete te onganinate. Aisati iromitococái angantiro ora caninaropague icábintsasantacáinta tojai. ⁸Aisati tojainta icábintsacái Tosorintsi igótasantaganacái ora icancái. ⁹Aisati igótacaganacái ora igábiriqueru Quirisito. Jirai te ogóguero ora igáqueru cara iragabisaicocái. Te ogóguë, paniro isëretaca Iriati Tosorintsi. ¹⁰Jiraisonorori iquengaigacái Tosorintsi icoigacái arota antingomintaiguemari Quirisito. Cara omoncaraquema omagaro ora ininti Tosorintsi, irapatobiritaiguëmari Quirisito antagaisati matsiguenga, ira timatsi cara Jonogaguitequë aisati ira timatsi yaca quibatsica. Ingantocoiguëri: “Quirisito Atingomisonori”. ¹¹Icoigacái. Yamai eironta itomijegui Tosorintsi icábintsacái aisati iromisantanacái irotoi cara iráganacái Jonogaguitequë arota antiomoqueru Iriro. Icábintsagái negaca aroquenta aquemisanqueru Quirisito. Jiraisonorigunte iquengaigacái Tosorintsi icoigacái teraiquerai

irobetsiquiro quibatsi, iquengaigacái aisati icoque ingábintsaigaái. Inganque Tosorintsi pairorapagueraca ora ininti. ¹²Naroegui jorío natsita quemisantaiguèri Quirisito arota yamai cara iraniaiguèna matsiguenga ingantaiguè: “Aisonori caninarisonori Tosorintsi ipasiniatitaiguèri jorío”. ¹³⁻¹⁴Aisati nacantaiguèmi pibega obirojegui cara cagaribi jorío, cara piquemisantaigabaquero ora aisonori jitacha Nibarintsi Caninaro, aro yogabisaicotaiguèmi Quirisito. Jirai icantaigacái Tosorintsi: “Aroca pinguemisanqueri Jesoquirisito Notomi, aro nomèmi Nasère. Aisati náganèmi Jonogaguitequè pintiomoquina”. Aro yamai coshoni ogaiguèmi Isère Caninaro, irooti pigóontaiguèma obiro iraisati Quirisito. Aisati pigóigui icábintsaiguèmi Tosorintsi antagaisati irooti cara irágaiganaquemi Jonogaguitequè pintsibataiguèmari pèrosati obirojeguinta iraisati. Iroro ora ingantaguètaiguè omagaro matsiguenga: “Caninarisonori Tosorintsi”.

Yamanocoqueri Ejesosati Paboro.

¹⁵Aro naquemocotaiguèmi obiro cara piquemisantaiguiri Atingomi Jesus aisati cara pinintaiguiri popiguemisanthane. ¹⁶⁻¹⁷Iroro ora pèrosati nacarasiaqueri Tosorintsi obirojeguinta yogabisaicotaji. Aisati pèrosati namanocotaiguèmi catingasatiquè Tosorintsi Ira Caninarisonori, Iriri Atingomi Jesoquirisito. Namanocotaiguèmi: “Pomeri Ejesosati Pisère arota irogótasantaiganaquemi”. ¹⁸Namanocotaiguimi irogótacagaiguemi ora paio yogabisaicobiritaiguèmi Tosorintsi. Icoguini iraganinasèretaiquemi. Nocoguini irogótacagaiguemi ora atiraca ongantima Jonogaguite cara irágaiganaquemi pintsibataiguèmari

pèrosati. Inganinatasantanè canta antagaisati quemisantatsiri. ¹⁹Aisati nocoguini irogótacagaiguemi Iriri sintsirisonoriguinte. Itosorintsitasanotineri omagaro quemisantatsiri. Yoganiasèretaái, itimacagajái, ²⁰aisa ocanta itinaajiri Itomi cara icamaque Quirisito. Aro yoganiatanairi yáganèri Jonogaguitequè yogasobiaqueri ibacosonoriquè. Yoguèri aganguisonoriquè icanqueri: “Notomi, Obiro Itingomisonoriguinte. Aroque noguibatèmi. ²¹Aisa pobatasantaguetiri antagaisati agátachari, obatacagantatsiri, itingomipague, omagaro. Pobatasantanèri omagaro timatsi yamaica aisati omagaro boquènguinsine aiquentata. ²²Aisati pigátiro Obiro pairorapagueraca ora inatsi aisati pigátaiguèri antagaisati quemisantatsiri ira botoibiritaiguimi. Yamai iriro icantaigaca paniro matsiguenga. ²³Irrojegui quemisantatsiri irianti pasi. Iniaiguèmi Obiro Itingomi pintsibataigari aintanta Obiro irirojeguiquè. Iquemisantasantèmini. Aitosati pigáti omagaro pairorapagueraca ora inatsi”.

Itimacagajiri quemisantatsiri Tosorintsi.

2 ¹Carari jirai te pigóigueri Tosorintsi. Aisati picantabetari ibegaiga camasèretatsiri. Te pinguemisantiri Tosorintsi. Picantagueigui ora te onganinate, pijáiguèma aiquero Sharincabeniquè. Carari yamai yogabisaicotaiguèmi Tosorintsi itimacagajimi arota pijáiguè aiquero Jonogaguitequè, pintiomotantaiguèri Tosorintsi canta. ²Jirai obirojegui picantaigari ira te inguemisante, piquemisantabetaigari Satanás ira itingomi omagaro camagari. Irro agáiguèri antagaisati matsiguenga ira te iriátsataiguèri Tosorintsi. ³Jirai acantabetari ira te inguemisante,

acantaguetabetaigaro pairoraca ora te onganinate ora ocogabeta aisati pairoraca ora aquengabetaigaca aronta acantiga. Iroto ora iguisaneintobicái Tosorintsi aisati icanta iguisaneinqueri omagaro te inguemisantiri yamai.

⁴⁻⁵Jirai acantaguetasantiro ora te onganinate, tenta ogóigueri Tosorintsi, te anguemisantiri. Carari tojai icantaneintëgotagái Tosorintsi inintasantacáinta, icábintsaigacái Tosorintsi irasinta yoguiro, aro ijacobentajái ora acantagueti te onganinate yogabisaicotajái. Jirai eiro aisati acantaigabitari ibegaiga camasëretatsiri, te anguemiri Tosorintsi, carari yamai aquemisanqueri Quirisito, itimacagajái aisa icanta itimacagajiri Jesoquisito. Yamai íaigui aiqhero Jonogaguitequë. Aisonori icábintsan-taigái Tosorintsi agabeni. ⁶Jirai icamaque Quirisito, aique itinaajiri Tosorintsi. Aisati acantari ibega Quirisito ipasiniatitajái Tosorintsi itimacagajái cara aquemisanqueri Quirisito Ira camobicái. Yamai coshoni aguiatëri Quirisito aronta atsibatari Iriro yamai aisati antsibatapëmari aiquenta Jonogaguitequë. ⁷Icoguini Tosorintsi cara ingantocotaiguëri matsiguenga yamai aisati përosati: “Caninarisonoriguinte Tosorintsi. Icantaneintëgotasantaiguëri quemisantatsiri, tojaisonori icábintsanotaiguëri cara igáqueri Itomi icamobitaiguëri”. ⁸Icábintsan-taigáininta Tosorintsi, iroto yogabisaicotagëcái aroquenta aquemisanqueri Jesoquisito. Tigueti pingantima pigabisaicotima obiati. Irianti agabisaicotigaimi Tosorintsi. ⁹Arome agabisaicotima eati, angantaiguëme: “Eiro caninari, ogabisaicotaja”. Carari icábintasantái Tosorintsi, te angantiro eiro pairoraca. ¹⁰Jirai itasongobencái Tosorintsi omatsiguengatacarí Quirisito

aroquenta aquemisanqueri. Aisati icoque antaguetineri ora caninaropague. Jiraisonori teraiquerai antime aroqueque icoigacái Tosorintsi antaguetasantiro përosati ora caninaropague.

Aroca aquemisantiri Quirisito, aro acantobaca omagaro: jorío aisati basiniatiegui matsiguenga cagari jorío.

¹¹Yamai pinguengaiguema cara jirai te pigóigueri Tosorintsi. Cagaribi obiro jorío ira totaigacha. Icantocotaiguëmi jorío: “Ira basiniati matsiguenga te irogóigueri Tosorintsi. Iriro quimingari tenta iritotaiguema aisa nacanta naroequi”. ¹²Pinguengaiguema ati picantaiga jirai: te pigótoçoigueri Quirisito, te pomatsiguengatimari joríojegui, teatisati pigóiguero ora icantasantëri jorío Tosorintsi. Te pigóigueri Tosorintsi, teatisati pigóigue ora icoque Tosorintsi ingábintsaiguemi iragabisaicotigaimi. Pitimasita tenta pigóigueri. ¹³Aisonori jirai pitimasitaiga picantaigaca cara pitimi jaasonorinta. Carari yamai obirojegui irasi Jesoquisito aroquenta piquemisan-taiguëri icamobitaiguëmi iraatobitaiguëmi. Aro yogabisaicotigaimi coshoni yogaiquëmi yamai. ¹⁴Jirai naro aisati antagaisati jorío naguisaneintaiguëmi tenta pinguemisantaiguero isanguenare Moisés. Aisati piguisaneintaiguina naroequi obiro aisati pomatsiguenga-jegui. Aique yogabisaicocái Quirisito yobegopitajairo cara aguisaneintobaca, itimacagajái caninasati yamai acantobagaigaca omagaro quemisanta-tsiri aquengaigaca. ¹⁵Jirai icanque Tosorintsi ati ingantaiguëma cara intimaiguë jorío cara inguemisantaiguëro ora isanguenare Moisés. Nacantasitaigaro nabisaicoontëmarome isanguenare. Carari icamobencái

Quirisito, imoncarabintacáiro ora isanguenare Moisés arota quero pobomirintsitaái queronta pigátái yamai. Jirai naquemisantaigabitario. Obirojegui te pigóiguero isanguenare Moisés. Nacasiriconiati-taigui te omatsiguengatobaguima. Carari yamai eiro irasi Quirisito, omatsiguengatacarinta Iriro aisati omatsiguengatobaca. Yamai acantobagaigaca, ¹⁶te anguisaneintobagajima. Cara aquemocoqueri Quirisito icamobicái cara corosiquè aquemisanqueri, icancái imatsiguenga Iriro. Yamai teni opégatsatimari Tosorintsi, teatisati opégatsatobaguima, atimaigui caninasati. ¹⁷Naroegui jorío. Jirai nigógabitacaró Irinibare Tosorintsi, naquemisantaigabitario. Obirojegui te pigóiguero. Pitimaigabita jaasonorinta. Aique eiro ipocasicái Quirisito. Ira iragátane icomantacái antagaisati ati angantajima omatsiguengatobagajima aisati ágacananatobaguima. ¹⁸Carari yamai aroquenta aquemisanqueri Quirisito yaretacacái cara Tosorintsiquè, jorío aisati ira cagari jorío omitococáinta Isère Tosorintsi. ¹⁹Jirai te pigóiguero Tosorintsi, te ingantimi. Carari yamai jee pigóiguiri Tosorintsi, itomintaiguèmi aisa pomatsiguengatacari omagaro ianiquite Tosorintsi quemisantatsiri. ²⁰⁻²²Eiro quemisantatsi osigaro ibango Tosorintsi. Cara antéro pongotsi, aguibatéro obebatsaquéro quibatsi. Aique opatotaiguéro otingomipoa, anchapoa, osi, sibitsa, antagaisati. Aique obetsiquè pongotsi. Ora pongotsi aisati ocanta ibegaiga eiro botoibiritari Quirisito. Iriro Atingomi. Icomantègotaguèri Iriro iragátaneegui aisati comantantatsirijegui. Aquemobèro irinibare, aro omitococái Isère Tosorintsi aquemisantaiguèri Quirisito.

Yapatotái. Aiquero ajátanètigue anguemisantasantanèri eiro quemisantatsi aisati coshoni aguiaguèri Quirisito Ira botocái aisa acanta cara apatobiritaigaro omagaro cara obetsiquèro pongotsi. Yamai Ejesosati obirojegui iraisati Quirisito aisa nacanta narogui jorío quemisantatsi iraisati. Pinancái Isère Tosorintsi. Aisonori eiro acantaro pibega ibango cara itimi Tosorintsi.

Paboro intineri ira quemisanquenguisine.

3 ¹Obirojegui cagari jorío, carari nanintaiguimi. Namanocotaiguimi. Nocomantaiguèmi iragabisaicotaigaimi Jesoquirisito cara pinguemisanqueri. Nocomantèmintá irooro ora yomingabiriquina iromingamentoquè yaca Iromaquèca. ²Najique piquemocotaguèna cara igáquina Tosorintsi najátagueque nongomantègotèri Iriro cara icábintsaiguèri antagaisati matsiguenga. ³Igótacaquena naro ora isèretaca Iriro jiraisonori, ora te irogóiguero matsiguenga. Carani nasanguenataiguèmi arosata. ⁴Aroca pinibataiguèro oca nasanguenataiguimica aro pigóiguèro ora icomantèna Tosorintsi cara isèretaca icantocoqueri Quirisito ora te ogótengani jirai. ⁵Te irogóiguero matsiguenga jirai, arosataanti igóiguèro comantantatsiri. Carari yamai ora Isère Tosorintsi pigótacagaiguèna naroguinta iragátane Quirisito. ⁶Obirojegui cagarimi jorío carari icomantèna Tosorintsi aroca pinguemisantaiguèri Quirisito aro iragabisaicotaigaimi aisati icanca cara yogabisaicotaiguèna narogui jorío aisatinta icamobitaiguèmi Quirisito obiro. Cara piquemisanqueri yasintaiguèmi Tosorintsi aisa icanta yasintaiguèna naro joríojegui

quemisantatsiri. Najitaiguiri nasi Pabati Tosorintsi; pijitiri yamai obirojegui pasi Piri; aisati ireintitobaca. Aisati acanta omatsiguengatobaganaca. Eiro irasi Quirisito. Antagaisati ora icanque Tosorintsi jiraisonori icantocotaiguëna jorío cara naquemisanqueri, yamai icantaiguëmi aisati obirojegui cagari jorío. Oca Caninaro Nibarintsi. ⁷Iroso ara iquenguitsatacaquina Tosorintsi. Aro icoiguëna naro, icábintsëna imitocoquina cara nocomantëgotague-
 queri. ⁸iCaninarisonori Tosorintsi! Antagaisati basini quemisantatsiri obataiguina tenta nongomeite naro. Najica naro carantatsiri. Carari icábintsasanoquina Tosorintsi. Icoiguëna naro cara nongomantaguëtai-
 gueri iraequi cagari jorío cara Ira Quirisito icaninatasanoti. Iriro cábintsantatsiri carari quero pigótëma-
 tagani omagaro ora icanque. Iragabisai-
 coqueri pairiraca quemisanquerine, intsibatëmari përosati. ⁹Igáquena Tosorintsi nogótacagaiguëri omagaro matsiguenga cara aisati inintaiguëri iriro Tosorintsi, icoguini iragabisai-
 cotai- gairi aisa icanta isëretaca jiraisonori-
 guinte cara teraiquerai irobetsiquiro omagaro. Te ogótengani jirai, carari yamai icomantaigacáiro. ¹⁰Icoiguini Tosorintsi cara yamai ira agátachari aisa itingomipague cara Jonogaguítequë iranaiaguëri cara yogabisai-
 cotai- gairi Tosorintsi ira quemisantatsi, ingantaiguë: “Igótasanoti Tosorintsi”.
¹¹Jiraisonori, teraiquerai irobetsiquiro quibatsi, isëretaca Tosorintsi iragabisai-
 cotai- gairi matsiguenga, jorío aisa ira cagari jorío. Yamai icanquero ora iquianca jirai cara icamobicái Jesoquisito Atingomi carari ca aisa icaniatanai. ¹²Aroquenta aquemisanqueri Jesoquisito quero ipasiguitaiguí catingsatiquë Tosorintsi,

abentaigacari, omanaiguëri Iriro, aquengaiguëri, inibatobaca eiro aisati Tosorintsi, igóiguë iquemacái, iniacanineataigacái caninari aquemisanquerinta Itomi. ¹³Iroso ora quero pipasiquibiritina cara natsipiriobi-
 quemi. Pinganinasëretague iroronta isëretaca Tosorintsi.

Paboro yamanocotaiguëri Ejesosati.

¹⁴Icábintsasantacáinta Pabati Tosorintsi iroro natingomintasantaguë cari. Aisati namanocotaiguimi. ¹⁵Iroso Iriri antagaisati quemisantatsiri yaca quibatsica, aisati cara Jonogaguítequë. ¹⁶Caninarisonorinta Tosorintsi Ira tosorintsitanotatsi. Iriro casintaro antagaisati. Iroso namanocotaguëtai-
 guëmi aroquenta pinasërequimi Isëre arota irosintsisëretaguëmi cara pingantagueigue tojai ora caninaropague. ¹⁷Aisati namanocotai-
 guëmi cara coshoni irogaiguëmi Quirisito intimacaquemi paneingomen-
 toquë aroquenta piquemisanqueri. Aisati namanocotaiguimi aiquero pijátanëtigue pigóiganaque inintasantai-
 guimini aisati aiquero pijátanëtigue pinguemisantaiganaquero. ¹⁸⁻¹⁹Aisati namaniri Tosorintsi irogótacagaigana-
 quimi obirojegui Ejesosati aisati omagaro quemisantatsiri cara tojaisonori inintasanoi-
 guimini agabenisonori Quirisito. Irasi yoguiro inintasanotaigái përosati. Te ogótengani omagaro ati ocanta cara inintasantai-
 guëmi. Aroca pigóiguë inintasantai-
 guëmi nocoguini tojai ingantocobentai-
 guëmi Iriro. ²⁰⁻²¹Sintsirisono-
 rinta Tosorintsi teni ongomëtatomotiri cara ingantocobentasanotacái pabisanaquero ora omanaquero aisati pabisanaquero ora aquengaiga. Iroso

ora aquemisantaguëqueri omagaro eiro Jesoquirisito yamai intsome angantocotiri: “Caninarisonoriguinte Tosorintsi. Tojaisonorinta icantocobentaigái cara igáqueri Itomi iragabisaicotajái, iraniacaninataiguerita caninarisonori antagaisati quemisantatsiri yamai aisati përosati. Aro ocarati”.

Intsome anguengasëretaiquema.

4¹Nocomantëgotërinta Quirisito yomingaiguëna yaca iromingamentuquëca. Aroque nasanguenataiguëmi cara ati ocanta icantocobentasanotaigái Tosorintsi aroquenta aquemisanqueri Jesoquirisito. Yamai nangantasantaiquëmi aroquenta itomintaiguëmi obirojegui Tosorintsi cara yogabisaicotajimi Quirisito, yamai pintimobitaigueri pingantaiguëneri ora caninaro. Aisati pinguengaiguema irootisati.
²Obirojegui, quero pomichati. Quero pipëgatsatari Tosorintsi, querootisati pipëgatsatari matsiguenga, pinibatiri caninasati. Antsiqueronisati pingantiri. Pomitocotiri popiguemisantane pinintirininta. Quero piguisaneintiri cara ingantaguete ora te onganinate.
³Pingogue pinguengaiguema irootisati, aroquenta pogometaiquëmi Isère Tosorintsi pintimaigue caninasati, përosati pingantobagaiguema obirojeguina irasi Quirisito.
⁴Antagaisati quemisanqueri Quirisito iriantiegui quingaigacha aisati imatsiguengatobaganaa. Patiro Isère Tosorintsi pinancái. Antagaisati eiro irágaiganacái Tosorintsi aiqenta cara Jonogaguetequë cara icanque Iriro jirai. Igóiguëronta oca iroso ora acaninasëretaguëque.
⁵Paniri ini Atingomi. Paniri Iriro aquemisantaigui. Paniri Iriro obaotisabiritaiga.
⁶Ainta paniri Tosorintsi Ira obetsiquëro omagaro. Icanque pairoraca ininti. Iriro

Pabatsonori omagaro eiro quemisantiri. Iriro casintái icantocobentantaigái, coshoni yogacái pinancáinta Isère.

Ipaguetáairo Quirisito panirootipague atarobacaare.

⁷Aisonori aquengaiga eiro iraisatinta Quirisito. Aisati ipaguetáairo panirootipague ora ininti imoncarataguetajáiro. Ipëna nro nongomantaguetiri omagaro matsiguenga ora Caninaro Nibarintsi. Ipagueiguëmi obiro basiniati pitarobacaare.
⁸Ora Sanguenari ocanti:

Cara yogainocanaa Quirisito cara
 Jonogaguetequë, aroqueque
 yagobiaqueri ira Satanás.
 Yágaiganaqueri tojai ira
 aguiataigabitari camagari jirai.
 Aisati ipaguetaiquëri
 matsiguenga pairoraca ininti.

⁹¿Pairoroco ocantira yogainocanaa? Ocanti cara ipaniaca canta Jonogaguetequë, aique yamasobingopë yaca quibatsica imatsiguengatapë icamobicái itiaca aisa itinaaja, aique yogainocanaa jonoquë.
¹⁰Ira aguëpënguisti yaca quibatsica Iriati againocanacha canta jonogasonorinta, yamai Tosorintsi icanqueri Iriro Itingomisonoriguinte arota iragáante omagaro cara jonogasonorinta irooti osobisonorinta.
¹¹Ipagueiguëri Quirisito iraegui quemisantatsi itarobacaarepague. Ainta ira icantacacari iragátane Quirisito. Basini icanque comantagueantatsiri, basini icanque quemisantacagantatsiri. Aisati Quirisito icanqueri basini omisantantatsiri aisati ogameantatsiri.
¹²Yogaguëtanacáiro arota eiro aisati antagaisati quemisantatsiri asintsisëberiqueru anguemisantasantanëri Quirisito aisati ogótasantanëri. Aique ingantaigái Tosorintsi antaiguineri aisati omitocotaigueri omitojaiganaqueri quemisantatsiri inguemisantasantanëri

Quirisito. Irosintsisèretanèri. ¹³Aro pèrosati ingábintsacái arequima anguemisantasantèri Itomi Tosorintsi arota anguengaigari ibega Quirisito aisati ogótasantèri. Aro aiquero ajátanètigue anguemisantaiganaqueri angantaiganaquimari Irro. ¹⁴Jirai acantaigari ibega janequi, te ogótasantiro ora caninaro tenta anguemisantasantiri Quirisito. Jirai te anguenguema catingasati. Yamatobitopiantái irapague ogomeantaguetiro ora te onganinate. Carari te iraninte Tosorintsi angantimaro pibega ancható ora posibitaguete coguentima. Icoqui angantimari antiasipari, icogui ogótasantaiguero ora caninaro. ¹⁵Icogasanti Tosorintsi cara anintaigueri basini matsiguenga, aisati caninataque ongomantagueigüeri Irinibare ora aisonori. Aisati icogui Tosorintsi aiquero ajátanètigue angantaiguemari Quirisito aisati anguengaiguemari. Irro Atingomi ¹⁶antagaisati eiro quemisantatsiri aisa opatobiritaiguëmari. Icancaí anganquimari paniro sèrari. Yogomecái arota omitocotobaguima. Aisati yogomecái cara angantobaguima caninasati, aro aiquero ajátanètigue anguemisantacaguiri basini aisati aiquero ajátanètigue anintobagaiguema.

Quero picantaja pibega cara jirai.

¹⁷Yamai nangantasantaiguëmi nongomantaiguëmi naro ora icogui Atingomi, quero pitimaigui aisati picantaigari ira te inguemisanti. Icantagueigui pairoraca irro, iquengasitaiganaca ¹⁸tenta irogógueri Tosorintsi. Icantari ira te inguenganeintëmatima. Teni iranintaigue inguengasë retaiqueri Tosorintsi, teni iraninte irogógueri. Irro te ingantocobintaguëtaigueri Tosorintsi, quero iáigui itiomotiri Tosorintsi Jonogaguetequë.

¹⁹Tojai icantaguetasanoigui ora quimingarosonori, te iripasiguitëmataigue cara yogamagasëreca. Aiquero iáiganaquitigue intaguetiro tsinanepague aisati ontaguetiri sèraripegue, icantagueigüero tojaisonori ora te ongomeite. Imichataigui, iroonti inganque ora inintaigui irirojegui. ²⁰Carari cara nogometaguëmi jirai nogometoqueri Quirisito. Te nogometaguëmi pingantaiguemari obirojegui ibega ira te inguemisante. Catingasati nogometaguëmiro ora icogui Tosorintsi pinganquero ora caninaro. ²¹Nigóti piquemocotaiguëri Jesus. Naati comantëgotèri ati icanta Jesus cara nocomantaiguëmiro ora aisonori. ²²Aro yamai quero picantaiga pibega jirai cara pèrosati picantagueigui ora te ongomeite irooti pamatobiantaa. Pijocajiro ora pintaguetasantabitaiga jirai ora te onganinate. ²³Quero piquengasëretaa cara picanta jirai. Pomemari Tosorintsi, aro imasiniatitai-gaimi. Omitocotaiguëmi Isère Tosorintsi pinguengaiguero ora caninaro. ²⁴Aroquenta yogabisaicotaigaimi Tosorintsi icantaiguëmi iraisati ianiquite. Iniacaninataiguëmi. Irro yamai pingantaiguero ora caninaro. Aisati pingantacarinataiganaquimari ibega Irro, iroonti icanque ora caninaro Irironta Caninari.

Yamai pingantaguete ora caninaro.

²⁵Yamai quero picantobagaja aisati quero pamatobitobagaja, pijocajiro, iroonti catingasati pinibataigueri popiguemisantane, eironta irasi Quirisito. Irro aisati eiro omatsiguengatobaca. ²⁶Aroca pinguisasë retiri basini ira cantaguetatsi ora te onganinate, querootisati picantaguete obiro. Cara pinguisaneintiririca, omanapague pomaguisantiro irooti

cataguiteri ²⁷arota quero icantëmatimi Satanás ira camagari querota intaguimi ora te onganinate. Queroca pobetsiquiro omanapague, queroca popeicoitara, përosatica pinguisaneintiri, aro irantacaquimi Satanás ora te onganinate. ²⁸Aroca picositi, quero picositai aisati. Pintarobacaate pobacoquë iroro caninara. Aro aitipague inaguetanë pairoraca cara pomitocoqueri ira coguetatsi iraperi, imanchaqui, pairoraca. ²⁹Quero pinibatiro ora te onganinate, iroonti pinibate ora caninara arota pomitocota-guetiri ira quemaigabaquemine arota inganinasëretanë. ³⁰Pingantaigue caninasati. Queroca pitimi caninasati, aro ogasërequima Caninara Isëre Tosorintsi. Quero pogasëretacagaro Isëre ora coshoni pogaiquëmi iroronta pigóontaigaca obiro iraisati Quirisito irooti cara cataguiteri quë cara iribocapae Jesoquirisito iráaigana-quemi Jonogaguitequë cara iraganinataimi. ³¹Quero piguisa. Quero piguisaneianti. Quero picatsimaanti. Quero piguisatsatanti. Quero picantocotasitagueteri pairiraca. Quero picogui pitsipiriacaguiri basini. Pijoquiro antagaisati cantacha nega. ³²Iroonti pingábintsabacaguima, pingantaneintëgotobaguima. Pomaguisaintiri basini matsiguenga ora icanquemi ora te onganinate piganinatabagajima ijocajimirona Tosorintsi ora picantaguetomoqueri te onganinate teni inguisaneintaigaimi yamai obirona quemisanqueri Quirisito. Aisati pingantimari ibega Tosorintsi quero piguisaneintobitanëri popiguemisantane ora icantaguetomoquemi te onganinate.

5 ¹¿Teco obiro itomijegui Tosorintsi? Inintasantaiguimini. Iroro pingantaguëquimari Piri.

²Pinintobaguima aisati pinganquimari

Quirisito inintaigacái icamobicái Iriati. Iniacaninatëro Tosorintsi ora icantobencái Itomi. ³Quero pintiro tsinane cagaro pijina, querootisati pintiri sërari cagari pijime. Quero poguiminasëretanti. Quero pinebetaro ora yasinta ira basinapague. Ira quemisantiri Quirisito quero icantiro negaca. Nocoguini ira pitimanamitane quero icantocotimi cara picantaiguero negaca. ⁴Quero pinibatëgotaguetiro tsinanepague, querootisati pinibatëgota-guetiri sërariapague. Quero pinibatobaga ora quimingaro. Quero pisërontobagaro ora te ongomeite. Antagaisati oca te onganinate quero omitocotaiguimi. Iroonti caninara angarasiaqueri Tosorintsi icábintsasantaigacáinta.

⁵Pigóiguero oca: quero iáti Jonogaguite-quë ira antagueantatsi, querootisati iáti ira quiminasëretatsi. Aisati ira nibetaro ora yasinta basini, aisa icantari ibega ira manëgotiri ibabane cagari Tosorintsiso-nori. Querootisati iáti iriro Jonogaguite-quë cara iragáantanequë Quirisito aisati irasi Tosorintsi. ⁶Pigamaiguema arota quero pairi matobitaiguimi, aintanta cogatsi iromatobiquemi irantacagai-guëmi ora te onganinate. Quero piquemisantaiguiri. Iguisaneintaiguiri Tosorintsi ingasítfgataiguëri antagaisati ira te inguemisantiri. ⁷Iroro ora quero picantaigari ibega iriro querootisati picantiro.

Pintimaigue cataguiteri quë.

⁸Jirai picanta pitimaiguë tsitiniriquë picantaguëigui ora te onganinate tenta pigóiguëri Tosorintsi. Carari yamai pigóiguëri aroquenta piquemisantaiguëri Itomi jitacha Quirisito. Aro pingantaiguema cara pintimaigue cataguiteri quë catingasati Tosorintsi, pingantaigue ora caninara ora ininti Iroro pingantaigue. ⁹Aroca antime

catagüteriquè, angábintsante, antime caninasati, catingsati anibatiro ora aisonori. ¹⁰Posamitima: “¿Pairoraca iraniacatinatè Natingomi?” Atsi pigóontaiguemaro negaca ora icogui Tosorintsi, aro pingantiro. ¹¹Quero picantari ibega ira cantaguetagatsi ora te ongomeite ira timaigatsi cara tsitiniriquè. Carari pipasiquitacagaiguiri ora icantaigui ora te ongomeite tenta omitocotaiguiri pairiraca. ¹²Iroonti pasiguitagatsi ora icantagueigui comanoroni ora te onganinate. Teni ongomeite anibatègotiro. ¹³Aroca anganque ora caninaro aisatica anguenguitsatiro Irinibare Tosorintsi, osangueguitetocoqueri, ogótacaqueri ora icantagueigui ora te ongomeite, ogonijaquero omagaro icantagueigui te onganinate. Irogóiganaquero. ¹⁴Ocari oca ocantagani:

Aroca pisamè, pingaguite. Aroca picamaque, pingabiritima. Aro irosangueguitetocoquemi Quirisito.

¹⁵Pigamaiguema ati pingantima pingantaiguèro ora pairoraca. Quero picantari ibegaiga ira te irogóte. Itimasita iriro. Carari obirojegui aisati pingantimari iraegui ogótatsi. Itimaque iriro caninasati iquemisanquero Irinibare Tosorintsi. ¹⁶Quero poperata. Pèrosati pintaiguero ora caninaropague arosonorinta ira cantagueiguiro ora te onganinate. ¹⁷Quero picantasitaguero pairorapagueraca. Pinguengasantobè ronta obitsita, pingogaiguero ora ininti Atingomi, aique pingantaiguero. ¹⁸Pinintica pinganinatè, quero pisinguitaigaa ontaqueminta ora tesonori onganinate, carari pinintacaguiro inantasantimi Isère Tosorintsi iroro antaquemine ora caninaro. ¹⁹Pinibatobagaiguema pingántataiguero Irinibare Tosorintsi.

Pingántabentiri Quirisito. Pingántatègotiri pasiquè pinibare. Pèrosati pingántatagobagaiguema piganinasèretobaguima arota piniacatinatagaiguè mari Atingomi. ²⁰Aroquenta obirojegui iraisati Jesoquirisito Atingomi, pèrosati pingarasiataiguiri Pabati Tosorintsi antagaisati pairoraca icanquemi. ²¹Aroca piniacobeingatiri Quirisito, piquemisantaiguirininta, aro pinguemisantacagobaguima aisati piniacatinatobaguima.

**Caninataque iranintasantiro iina sèrari,
aisati caninataque onguemisantiri ojime
tsinane.**

²²Tsinanejegui ¿Piquemisantiri Atingomi? Aisati pinguemisantiri pijime irironta cantaca pitingomi. ²³Ira sèrari otingomintari iina, yomisantiro. Iroro aisati icantari ibega Quirisito Atingomi eironta quemisantiri yomisantanacái. Yogabisaicocái yasintaigái. ²⁴Aisati apatoibiritari Quirisito cara aquemisantirini aisati ocanta ora tsinane caninataque pèrosati onguemisantaiganaqueri ojime omagaroquè. ²⁵Obirojegui sèrari aisati pinintasanotiro pijina aisati icanta Quirisito inintasanotaigacái iroro eiro apatoibiritari Quirisito icamobicáinta ²⁶arota irasintaigái aisati iraguètetaái anguemisanqueronta Irinibare Tosorintsi. ²⁷Icoguini iraganinatasananacái arota cara iribocasitacái iraniacatinatagaipái caninarisonoriguinte. Quero pini eiroquè pairorapagueraca ora quimingari. Aro iráganacái eiro iraisati antiomoqueri Jonogaguetequè pèrosati. ²⁸Aisati ocanta caninataque sèrarijegui iranintasanotaiguèro iina inganquero cara inintiro iraisati ibatsa. Ira nintiro iina, aisati ininca iriati, aisatinta iina ocantaro irasi ibatsa. ²⁹Te poro

quisachane iriati irootinta iraisati ibatsa, carari icábintséro ibatsa, yomisantiro aisa icantari ibega Quirisito icábintsacái eironta quemisantiri. ³⁰Yomisantanacái eironta iraisati coshoni yogacái.

³¹Ocanti Sanguenari:

Iroro ora aroca iráque iina poro sërari, intsiparianëmari iriri, aisati iniro, përosati coshoni iroganëmaro iina. Ira sërari aisati iina ingantaiguëma paniro ibatsa iriro. Coshoni irogobaquima. Te onganinate irojocobaqajima.

³²Oca osanguenaca jiraisonoriguinte. Iroro ogameantagantsi caninaro. Ocantocoqueri sërari cara iráquero iina. Carari yamai nigóti ocanti basini aisati. Ocantocoqueri Quirisito cara irágaiganacái omagaro iraisati irianti quemisantatsirijegui. ³³Yamai nagatsitaigaimiro sërari: pibega pininta obiati, caninataque pinintasantiro pasi pijina përosati. Aisati, tsinane, caninataque piniacobeingatiri pijime aisa pinguemisantiri.

Ati ocanta angantiri otomi aisati ati ingancái iriro.

6 ¹Janequijegui, aroca piquemisantai-guëri Atingomi, icoguini aisati pinguemisantiri piri aisati piniro. Caninataque pinganquero negaca. ²⁻³Jiraisonori Tosorintsi ipaiguëri matsiguenga ora jitacha 10 iragáantane aisati ojita mantamientos. Patiroonti pini cara icanque aroca anguemisantique-rica, aro ingábintsagacái. Ocanti:

Pinguemisantiri piri aisati piniro. Aro pintimaque caninasati yaca quibatsica aisati cosamani pintimaque yaca.

Iroro caninataque cara inguemisan-queri iriri janequi. Aisati irooti cara irantiasiparitanë, iromisanqueri iriri.

⁴Yamai, sërari casintari janequi, quero

piguisasitagueteri ira pitomijegui, iroonti pogomeantëmari ora Irinibare Tosorintsi. Pingantasantiri inguemisan-tiri Atingomi.

Ati ingantima ibimantaga aisati irobatorote.

⁵Obiroca ibimantaga, pinguemisantiri aisa pijátsatiri pobatorote irironta pitingomi ira casintimi yaca quibatsica. Piniacobeingatiri. Aisa ocanta pintineri Quirisito antagaisati icogui, aisati pintineri pobatorote omagaro icogui iriro. ⁶Quero pamatobitiri, pintineri caninasati cara inetsimi aisati cara te iranetsemi. Pintarobacaatineri arota iraniacaninatëmi. Pijátsatiri aisati pinganquima cara piátsatiri Quirisito. Pintineri Tosorintsi antagaisati ora icocaquimi. ⁷Aisonorinta pintineri Quirisito pinintirininta, te paniro pintineri sërari. ⁸Pigóigui, pairoraca ora caninaro picanque, aro imëmiro Quirisito. Jemita obiro ibimantaga, jemita obiro irobatorote, ingantocoben-taiguëmi. ⁹Aisati obirojegui merataigari matsiguenga, pingantiri caninasati, pingábintsaguëri. Quero piguisaneintiri pigótinta ainta Jonogaguetequë Atingomi. Irro pasi Pitingomi aisati Itingomi ira pomeraro. Iniaiguëri omagaro matsiguenga iriatísati, obiro aisati pomeraro. Aisati picantobaga.

Ira quemisantatsiri icantari ibega soraro.

¹⁰Panibati nongomantaiguëmi, nopiguemisantacagane: pomaniri Atingomi cara irosintsisëretaiguëmi piguëiri ingantiro Irro. Cara pinguemisantantiri, irooti irosintsian-taiguëmi Irironta sintsirisonoriguinte.

¹¹Pingantaiguëmari ibega soraro Iromasati cara irobetsiquima cara iriátë iromanátima arota quero yógani. Irotsita iromatsaguëtëma. Aique

iroquimaro igamisate coshotaquiro. Irisapatotëma. Iráquero oquibe ora iroticantobëmaro chocopi ogamataga. Iroquimaro coshori isampiriro. Aique iráque isabirite. Aisati pingantaiguëmari ibega soraro, pabentaiguemari Tosorintsi, imaiгуëmi omagaro ora popëgatanquimari camagari arota quero yamatobitagetimi quero yagobeimi Satanás. Iriro itingomi camagaripague. ¹²Teni opëgatimari matsiguenga, irianti ipëgataca ira te iraneingani. Ipëgasëre-taigacari arosonori camagari: Satanás, aisati omagaro basinipague camagari. Ainta ira agátachari, aisati ira itingomipague basini camagari, aisati ira cantaguetacaguiri matsiguenga ora te onganinate, aisati ira tsoengaguetacaguiri matsiguenga, antagaisati camagaripague. Igátaiguiri antagaisati matsiguenga te inguemisantiri Tosorintsi. Iroonti icantaigui camagari ora te ongomeitëmate, ora quimingarosonori, ora antaguiri matsiguenga ora te onganinate. Ira camagari iguisaiguëri Tosorintsi aisati iguisaigacái eiro eironta aguiataiguiri Quirisito. Inagueti ira camagari jonoquë aisati yaca quibatsica. ¹³Iroto ora pinguemisanta-guëtaigueri Tosorintsi, pabentaiguemari. Pinintacaguiri iromitocoquem. Imaiгуëmi omagaro ora popëgatanquimari camagari. Iromitocotaiguëminti Tosorintsi aro pigabeiri cara ingogabequima camagari irantacaguimi ora te onganinate. Cara pitsonquero, përosati pinë paratinganë. ¹⁴Paratingaigue, pinguenguero Irinibare Tosorintsi iroonti aisonori. Pinibate ora aisonori, aro popëgatëma. Aroquenta piquemisantaiguëri Quirisito iniacanina-taiguëmi Tosorintsi. Përosati pingantiro ora caninaro. ¹⁵Cara pigótasantaigui ora Nibarintsi Caninaro, quero pogasëretocotari Satanás. Aro pingogaigue

pingomantaguetiri matsiguenga iragabisaicoqueri Quirisito cara inguemisanquerica iromagoriasëretagai-ganaqueri, intimacaguiri caninasati. ¹⁶Pinguemisantasantaiganaqueri Quirisito, aro ingábintsëmi arota quero icantëmatimi camagari, quero intaguetacaguimi ora te onganinate, aitinta tojai icoguini Satanás irantacaguimi. ¹⁷Aisati pabentaiguemari Tosorintsi, pigótasantaigueti aroque yogabisaicoquemi. Aro omitocotimi Isëre Tosorintsi cara pinibatanquimari camagari ora Irinibare Tosorintsi. Aro irisigabitsatanëmaro itsoroguirotinta Irinibare Tosorintsi. ¹⁸Pomanopiantiri Tosorintsi cara ogometaiquemi Isëre arota omitocotimi. Pomane cara pipëgatari aisati pomane cara tera popëgatimari. Quero poperata. Pigamema përosati pomanocotaigueri antagaisati ira quemisantatsira. ¹⁹Aisati pomanocotaiguena naro arota quero notsorogui cara nanibatë, cara nongomantaguetiri matsiguenga catingasati, cara Tosorintsi inintasantai-guiri icogui iragabisaicotaiguëri omagaro quemisantiri Jesoquisito Itomi Tosorintsi cara icoque jiraisonoriguinte, ora te ogótingani jirai. ²⁰Aroquenta nocomantëgotëri Quirisito yomingaiguëna naro iragátane Quirisito. Nocoguini pomanocotaiguena arota caninasati nongomantaigueri matsiguenga ora Caninaro Nibarintsi cara icocaquina Tosorintsi. ²¹Nagáqueri Tíquico cara obirojeguiquë. Ingomantaigapëmi atiraca nacanta naro aisati pairoraca ora nanti. Iriro opiguemisantane aisati nanintane. Caninasati intineri Atingomi ora icogui Iriro. ²²Nagátaiguëmiri ingomantëgotaigapëna naroequi canta. Aisati nocogui iraganinasëretaigapëmi. ²³Yamai,

naguemisantacaganeegui, nocoguini
 iromagoriasëretagaiguemi Pabati
 Tosorintsi aisati Atingomi
 Jesoquirisito. Aisati nocoguini
 inguemisantasantacagaiganaquemi
 obirojegui, aisati iromitocoquemi

pinintasantaiguero popiguemisantane.
²⁴Yamai, aroca pinintasantaiganaquero
 Atingomi Jesoquirisito ingábintsai-
 guemi.

Aro ocarati nasanguenataiguëmi.
Paboro